

焦太史編輯國朝獻徵錄

焦太史編輯國朝獻徵錄卷之五十三目錄

南京工部二

侍郎

沈暉

李春

程萬里

劉俊

黃孔昭

徐恪

張恕

張羽

何孟春

張鉞

程文德

嚴時泰

郭鑒

王昺

全元立

蔡汝楠

劉慤

方廉

江治

郎中

徐愛

主事

李滄

何廷仁

目錄

焦太史編輯國朝獻徵錄卷之五十三

南京工部二

侍郎

南京工部侍郎沈暉傳

實錄

南京工部侍郎沈暉字時暘直隸宜興人天順庚辰進士授南京戶部主事歷員外郎郎中成化戊戌改南京禮部尋陞陝西布政司參議以憂去服闋復除福建未幾進本司參政弘治庚戌陞廣西右布政使衛士以缺糧相煽爲亂暉捕得首惡三人斬之遂定明年轉江西左布政使甲寅陞都察院右副都御史

撫治鄖陽下令許民之無田者得耕廢棄地免其租  
三年歲餘得常稔田數千頃又甃鄖陽城十有二里  
於襄樊往來要津造浮橋八十艘以便涉者民甚德  
之未幾改廵撫湖廣時武岡州知州劉遜坐裁抑藩  
府被誣暉爲直之戊午召爲南京工部侍郎明年以  
言官論劾力求去正德十三年卒賜祭葬如例暉躬  
歷中外幾四十年頗不失職其爲侍郎較工計直細  
及錙銖人多怨之用是屢招浮議然暉旣去繼者閱  
舊蹟頗以暉所執爲是云

南京工部侍郎李公春墓志

周洪謨

南京工部左侍郎李公于成化十九年八月八日卒于家朝廷遣官諭祭勅工部營葬事其子以翰林檢討武衛所狀公行來乞爲墓志按狀公諱春字遇時號竹素其先青之青光人曾祖諱得者徙居丘縣遂附籍焉祖諱希原父諱子實皆以公貴贈嘉議大夫禮部右侍郎妣贈封皆夫人公自幼凝重不與羣兒伍稍長入邑庠爲弟子員正統戊午領山東鄉薦入國學友天下士聞見旣博尤精法律久之擢南京刑科給事中未幾以公儀觀偉而語音正調北京禮科

已巳虜犯京城大軍出禦之公紀功以嚴明稱三載  
績最始受勅封及父母辛未遷本科右給事中尋陞  
都給事中壬申遷光祿寺少卿天順中陞雲南右布  
政使辛巳夷賊犯金齒太監梅忠舉公協贊大軍征  
討擒賊七十有五斬首二百餘級獲象馬甚多癸未  
英廟念其前勞召進禮部右侍郎掌光祿寺事仍支  
二品俸 今上在東宮時公在光祿供奉謹慎賜白  
金綵幣甚厚成化丙戌公請休致 上不允戊子陞  
左侍郎改工部丁內艱服闋調南京工部乙未秩滿  
也載又疏乞辭 上又不允陞正二品俸仍掌南京

工部事戊戌以公務至京復懇乞歸始從其請既至  
家容與林泉者五年距其生永樂己丑之歲得年七  
十有五公操履端慎待人接物則和而且厚素甘澹  
薄一裘數十年不易可謂尚德君子者矣



南京工部右侍郎程萬里傳

程萬里字道遠湖廣華容人天順元年進士擢吏科給事中陞都給事中通政司左叅議進右通政往理易州山厰成化乙未內批陞戶部右侍郎丁酉自陳乞致仕不允調南京工部未行科道糾其素乏清舉且犇競遂令致仕萬里善談論在吏科每隨衆言事亦有可取者但無特操以干謁倖門得侍郎故士論不容卒劾去之成化十九年六月卒有司以聞援例乞祭葬予祭一

南京工部右侍郎劉俊傳

實錄

劉俊字士英陝西寶雞縣人正統乙丑進士及第授翰林院編修景泰中遷左春坊左贊善天順初改翰林院修撰甲申陞南京國子監祭酒未幾被劾改南京通政司左通政久之召至京以通政總理武職貼黃成化乙未秩滿遷南京太僕寺卿戊戌遷南京工部右侍郎丁未以老疾乞致仕成化二十三年八月卒俊坦易率直不爲詭異之行英廟復辟時石亨等迎駕功亦欲假文士爲重所嘗與往來者多竄名陞因俊爲其鄉里故遣人通意俊峻拒之人以是多

其守第晚年頗以衰頹戀祿爲士論所薄云

南京工部右侍郎黃公孔昭傳

吳寬

公諱孔昭字世顯姓黃氏唐末有諱緒者爲昭武鎮都監避亂自閩中徙家台之黃巖後其地割爲太平故今爲太平人所居洞山更數世族益大人稱洞黃曰與莊有善行生禮遜號松塢尤邃于學以剛介好古聞鄉里禮遜生瑜兵部職方主事賢名甚著生公二世並以公貴贈南京工部右侍郎公年十四職方公與母夫人金氏相繼下世自京師扶柩返葬哀毀骨立人已謂黃氏有子旣長執友建寧守賀滋知其賢舉爲松溪訓導不果公嘆曰士之出仕乃藉人舉

薦耶慨然誓取科第以世其家樓居讀書刻苦特甚  
至忘寢食及入邑學家貧乏資給而學益力遂中鄉  
試天順庚辰登進士第初授工部屯田主事同官有  
貪污廢事者與公不合以計擠之無所得而公之名  
因起其人既被黜公獨署司事事悉舉而宿弊盡革  
時適議 慈懿太后山陵公憤其事曰治葬吾職也  
亟草奏疏將上而朝廷竟從衆議乃已尋擢都水員  
外郎郎署無故例不得改調吏部以公賢而工官非  
宜特奏改文選命下皆以爲宜後進郎中公持選法  
最慎汲汲以人才爲慮嘗曰國家之用才猶富家之

積粟粟積于豐年乃可以濟飢才儲于平時斯可以濟事自頃人矯激沽名以閉門謝客爲高天下人才何由知之故公退客至輒延見詢訪有所得必書于冊往往量其才隨其地參之輿論薦于天官卿用之務使各當其才雖小官卑職亦不敢忽或因勢家干請欲私用其人輒力言不可時旣不能盡沮後其人多自敗衆始服公凡在文選者十五年擢通政司右通政專清武職貼黃又三年始擢南京工部右侍郎時工役不息屢假私錢給材用歲久多所逋負公至以提舉等司隙地皆爲豪強侵占奏復之以收其利

公署燬于火且重建一新方漸革諸弊一如屯田時而公俄以疾卒矣年六十四公清介有守自舉進士已有廉名及授秩以公事之江南雖鄉人之仕其地者以尺帛來餽亦却去後同考會試有勢家子暮夜持百金私謁叱之不容見然終不言其人其處公事必盡其力非特無私而已終身儉素雖老且貴如未仕時至待宗族獨不計惜嘗以舊居悉讓其弟以女弟貧乏斥俸令養之凡親友患難疾病必扶植乃已尤不妄交游故布政使陳公士賢今祭酒謝公鳴治皆鄉人之卓然者獨以道義相好若刑部侍郎林公

一鶚旣沒念其子孱弱經紀其喪復輯其事行傳之  
後奉 詔得薦舉異才以今應天府尹樊公廷璧福  
建按察司僉事致仕章公德懋奏士論以爲得人平  
生好學不倦公暇輒手一冊日求古書多自校正更  
輯鄉里前輩文詞爲赤城論諫錄并赤城詩集板行  
於世其所自著質實而理勝有定軒集若干卷子備  
工部主事居官有父風計聞朝廷遣官祭葬如卹典  
論曰周禮太宰之職掌建邦之六典蓋兼六卿之事  
無所不掌者也後世特以選舉爲務其屬分任于下  
爲部凡四其職可謂專矣而文選尤爲要秩使其人



不賢雖有賢太宰不能獨治百官由之不得其人此其所以爲要也昔毛价仕魏爲東曹掾所舉皆清正之士能以儉率人一時皆以廉節自厲今觀公之爲人蓋亦近之後雖超遷惜其卒以工官而去雖有知者薦爲已助而竟不用是可嘆也予聞正統間黃巖有李茂弘考功靜退有守君子人也其名至今不衰公嘗慕而稱之以追其遺風孔子曰魯無君子者斯焉取斯其是之謂歟

南京工部右侍郎徐公恪神道碑 李東陽

弘治乙卯公以都察院右副都御史巡撫湖廣一日忽有中旨遷南京工部右侍郎公聞命駭愕亟上疏言臣平生不敢自他途進乃今名不薦於廷臣銓不由於吏部臣之心迹何以自明乞收新恩以全晚節因以疾告 先皇帝優詔荅之乃就職又再疏請老弗許戊午獻績于朝疾遽作又請乃許給稟驛而歸言事者往往起公不果癸亥三月七日卒年七十三遺戒子孫勿乞葬祭甲子歲未盡一日寔于鳳凰山姚塘之原後馮御史允中按南畿表公名行爲請卹

典 朝廷乃遣官諭祭命有司治北域嗚呼觀公之  
終可以知其始矣公在成化丙戌舉進士爲工科給  
事中諸中使欲領鄉關抽稅公與同官言不可遂遣  
諸給事往莅意因以窘之會公在遣中撫拾無所得  
乃止乙未擢湖廣布政司左參議值兵荒後加意撫  
卹民賴不徙有中使採竹筍諸物責非所產地公移  
文止之甲辰秩滿遷河南右參政陝西饑當運粟數  
萬石民苦遠公請出粟易銀界之彼此稱便弘治戊  
申進右布政使遷左布政使有藩府承奉司違制置  
吏公勒停之會計財賦謂費用寢廣歲入且弗給乞

少節京運以寬民力庚戌河徙開封有奏遷藩會者  
公條陳不可事竟不行辛亥遷都察院右副都御史  
巡撫河南旱溢交作公請減秋稅省織造折鹽課有  
藩府據魯山民業公承命會勘議歸之民戶部督積  
逋急公以災變請緩其事有言官請割漢中鄖陽夔  
州諸府別置布政司公亦言不可鄰境民未就食發  
粟賑之所活甚衆尤重名教令歸德修微子祠彰德  
建西門豹祠洛陽祠范文正又令諸州縣學秩賢哲  
無文者公名益章而忌者日益甚再乞歸不許於是  
有湖廣之命兩河士民夾道攀送哭聲聞數十里不

歆布政有羨銀三千兩舉以爲贐公一無所納至則  
有中使載私離百艘抑市于民爲公所持比去乃得  
市云公器宇凝重不事矯飾而中所操執介介不苟  
雖優仕不倦問學自輯所爲詩文奏牘若干卷藏於  
家修家規以合族子弟雖頒白無敢肆者其高年令  
德蓋非特一郡之望也公姓徐氏諱恪字公肅蘇之  
常熟人祖德賢考納皆贈都察院右副都御史

南京工部右侍郎張恕傳

實錄

南京工部右侍郎張恕字希仁順天府霸州人成化辛丑進士初授山東夏津知縣入爲南京山西道監察御史弘治己未遷河南按察司副使專修河道乙丑遷雲南按察使正德改元擢南京都察院右僉都御史提督操江尋進南京工部右侍郎正德三年七月卒于官賜祭葬如例恕清慎篤厚性儉素雖老且貴如未仕時始終三十餘年田廬無所增益卒之日家無遺財士論賢之

南京工部右侍郎張公羽墓志

呂柟

公諱羽字伯翔號中梁漢中南鄭人也祖諱某父諱廣以公貴贈如其官公爲學官弟子員好學不間寒暑弘治辛酉領鄉薦乙丑登進士第以憂歸服闋授行人奉使西蜀却其餽金一無所受先時愛業師陳添福戍遼東公恆念之一日有遼差隆冬險地人苦不欲去公自請行且言有師在彼欲往候當塗義之乃卒全師以歸是時冢宰銜公疎濶兩選不與人以勸公公曰窮達有命耳正德初宦瑾用事公獨不近瑾敗諸趨者皆被禍公始授御史遭流賊猖獗公經

略內外日夜戒嚴事平賚衣一襲巡按淮揚山東刺  
舉無私比回所部吏以金餽正色拒之時宰以故人  
門生屬善視之之部按之則山東號三大害其中有  
二焉乃首劾去之會中官導上游獵錫予頗濫公  
上疏曰明主慎德必矜細行不以禽獸病民尤當謹  
衣裳之在笥也寢不報舉朝皆壯其奏然終以得罪  
時宰出守廣平至則選賢良退貪殘施行條教胥吏  
舞文者痛繩以法吏卒畏憚莫敢仰視雖隆寒盛暑  
漏下五鼓必起視事夜分乃寢訪獲積年民害充發  
配所餘悉以次徒遣然又和易近民視之如子盡得



其情加惠于鰥寡衣食居處時親省因刻羅氏諭屬  
文以勵僚屬創建漳川書院羣漳士高等者游業其  
中躬自督課漳士日嚮于學彬彬著于科目若乃郡  
中賢士大夫里居者不問崇卑往候其家問民疾苦  
舉行之遂建開通木開田千畝以資困農奏表趙氏  
以勵婦節嚴禁縣官阿稱以一士風置木牌令得自  
白以達民情處方藥以劑貧病收積市利以蘇里甲  
當是時旁郡之訟咸願歸質廣平廣平視諸旁郡若  
大府焉吏有不法者率望風解組去順德囚母與僧  
通子已壯不改惡其子之言也乃入井死會當決子

公曰毋無行負夫與僧私通顧可殺子絕夫嗣乎因遂得釋鉅鹿有告婦奏一嬰官暴殺其夫吏受委成憚其能決公按而寘諸法要宦懼厚賂朱寧誣奏下公獄吏民爭斂錢賄寧爲公求解公曰吾寧失官不敢失志若等愛吾幸無枉吾志也大理直其誣乃還郡自後民益相信斷獄大省爲八郡最會河間守缺少宰廖公請于冢宰曰吾郡疲甚借願張守一年比調河間士民泣而送之擁輿不能行去之日民有遺思懸像而尸祝之者河間郡中無賴數十恃豪橫于鄉曲則召地方當甲者謂曰若爲甲不緝捕奸俠鎮

今橫苦小民守姑貸若罪其密報以來於是武斷之  
豪悉斂迹改行郡中以清尼寺數十濁亂民俗乃廢  
其寺歸少尼於民之無家者卽其地立社學教郡中  
子弟又收恤廢孤于養濟院郡中有故周卿者先守  
漢中性頗偏科舉士係府學者得給票過館係縣學  
者獨不予至使公徒步行赴省城及公守河間訪其  
家貧甚周歿時朝廷予祭有司亦廢閣公移文給米  
八十石舊僚通判周禮素清苦歿而妻子貧甚負貸  
莫能償諸貸家日督之公乃延諸貸家以酒食曰若  
幸與周有鄉里分周故善吏也忍窘其妻子乎於是

諸貨家多感動出券不復取乃擇隙地居周妻子親  
爲文祭周墓 武宗皇帝南狩有司供帳吏緣爲姦  
平陽散官錢陰敎富室惟河間據郡中錢治具軍民  
不擾供帳以辦河間廣平京師股肱郡素稱浩穰難  
治聲名籍甚 今上卽位擢用良吏始遷公山西叅  
政分守大同有巡撫張某者不恤軍士穀尚未熟奏  
官促糧軍民驚擾公入言不聽出卽遣牌弛其限軍  
民始定巡撫不悅又暴動軍士築堡沙磧公固爭之  
亦不聽軍中已有異言畏公不發比公回省不越月  
而變作張遂成焉及改守冀寧道首捕妖賊下之梟

獄晉人無弗稱快尋轉江西憲使時省缺布政使有  
徐御史者薦曰張羽德量渾厚心事光明操行剛方  
才猷老練若舍羽推補別省官員是舍驥而索鶻也  
公雖抱質敦厚生平不喜造請權貴當道嫌之乃左  
遷貴州至則出納慎防吏不敢私一日吏白餘金舊  
規不報公盡數登籍久之晉南京大理寺卿多所平  
反有疾乞休上溫旨勉留未幾轉南京工部侍郎  
展修國學號舍數百間窮治假印吏除姦惡數十輩  
又部主事王度嘗捕治京猾滕氏不法事王憂歸會  
考察被滕譏吏部欲黜王公曰滕之橫京師誰弗知

者獨王能捐之顧肯納其賄耶王得不黜先時經營吏率以裁省爲能市材率不予直卽予莫能償其本衆苦之公三度給價尙無退怨尋再疏乞休會被推本兵時黠虜入寇三鎮告急乃不復敢言去頃之考績還以疾卒于淮上年六十有四初公七歲時母病爬頭蟲甚爲苦公默取吞之蟲不復生少受學於陳生甚嚴公時密歸省陳初怪之後知其爲母也益加愛重繼母楊淑人年少公事之甚謹家貧好學雖羣輩嬉戲手不釋卷性謙抑寡言衣服居處喜儉素平居未嘗言人過亦不喜虛美人處家教子嚴而以正

每日凡事讓人不可傲慢又曰溺愛反爲不愛居學  
與諸友取分膳銀住廩五人中有貧者公議均取諸  
友皆樂從贈公自什方歸頗貧公將赴省試辭贈公  
昔嘗貸金于邢不能償邢移書讓之贈公醉臥繼母  
泣道邢事公憤然曰父辱子憂何以試爲夜行三十  
里出費償邢山路阻險夜行幾不利歸贈公覺大驚  
更與典地爲費步行赴省其睦宗族皆有恩禮每道  
書曰爲士者當自重勿入公衙爲民者當守法勿犯  
有司母家子孫零落止有二孫牧牛于人公收養拊  
立憫恤吳聶二友病故旅邸輿歸其櫬百戶陳璽襲

職被盜褻蓆來謁乃易衣醫療亦賸使完歸蓋公與人處恂恂若無所能而見義必爲萬折不回居常于錄先賢要語帖置左右以自警切雖年逾六十位至九卿見僕吏鄉人未有情容予嘗以爲西漢周勃張歐之輩人也公心本純誠雖鬼神可通其舉鄉試會試之先皆有火光殞于庭父母親見在學時友人蕭鳳妻迷于邪語不知恥公每至其門輒避匿曰張大人來也後諸友同以物鎮邪夜投磚石于諸友號舍獨不敢犯公贈公居什方時病革公日夜奔泣比及界夜昏路不能辨忽有笛聲導之至縣甯卽不聞時



贈公幾死復生人以爲孝感云巡按淮揚時泗州察院有妖劉御史至夜驚不能寢公居數日妖不復聞後劉復至不敢入召問守者云張公住時止見一鬼甚大捧藥跪牀下耳然則公自行人御史以至廷尉司空所至効績豈偶然哉

南京工部左侍郎贈禮部尚書燕泉何公墓誌

墓志銘

羅欽順

嘉靖甲申春南京一二郎官疏請更議大禮有旨廷臣集議何公子元時爲吏部左侍郎前後疏三上勸上從初議甚懇旣而請更議者條舉十三事以證其說公偶得其草卽夕具疏逐條辨析甚詳旣入遂偕百官伏闕以請久之未得命則相與號泣于廷上聞之震怒下羣臣獄罪謫有差而奪公俸一月尋調南京工部於是中外論薦吏部會推頻年不置忌者常力沮之丁亥春引疾乞休特准還鄉調理明年六

月明倫大典成俄降勅諭坐公以鼓率朝臣伏闕喧  
嚷削職爲民再踰年都御史張公翰疏稱公有經濟  
才不宜終廢不報丙申五月朔竟以疾卒距其生成  
化甲午得年六十有三而家居十年矣有識相弔皆  
爲天下惜之公諱孟春子元其字別號燕泉先世本  
吉廬陵人由吉遷廣在元爲都統鎮郴桂者又自廣  
徙郴傳至合州同知諱儀堅公曾祖也大父諱俊雲  
南提學僉事父諱說刑部郎中以公貴俱贈通議大  
夫吏部右侍郎大母廖繼李母李俱贈淑人公性稟  
超異方數歲聞人誦長篇已卽能覆誦黎文僖公一

見目爲奇童長遊李文正之門文正每携公所作以示同官曰此吾楚後來之傑也壬子鄉舉第二人連登進士第將試翰林庶吉士會丁父憂丙辰授兵部職方主事鋒穎日見歷陞員外郎郎中大司馬馬端肅公劉東山公皆器重之東山公每有大政及邊方急務率與公商處他司疑事亦咨決焉及丁大父憂去官東山念之如失左右手嘗奉使山西查理馬政繼往陝西毫無所漏巡撫大臣亦有被公論劾者因列上五事僉以爲當俄丁繼大母憂又丁母憂壬申擢河南左參政其施設務在便民嘗行部在鈞州得

公移稱山東盜起宜集民兵爲備公以僭聞未必審  
晨時不可失持不行旣而果無警時惟大梁一道免  
於騷動公之力也民有失婢者得尸井中無所歸罪  
公稍加窮詰卽獲真賊時稱神明入爲太僕少卿民  
老幼相扶携沿道扳戀依依不忍釋其得人心如此  
在太僕上言馬政究其本末兵部取爲條例奏行之  
寺儲折馬價銀本以備重大不虞之用 武廟欲取  
給他費公與同官力言不可事竟寢戊寅由太僕卿  
陞右副都御史巡撫雲南所興革尤多事具撫滇條  
約有厲民者輒擊去之十八塞蠻惡旣稔率兵徂征

斬獲餘萬計民大悅捷聞賜勅獎勵因改立永昌府  
增五長官司五守禦所賦入歲增若干石論功陞蔭  
蔭子皆辭辛巳陞南京兵部右侍郎壬申改吏部公  
與喬白巖林見素彭幸菴汪石潭諸公素相善同時  
居位謀議施設多有助焉無何相繼引去及諸公物  
故聞之未嘗不流泣也天性至孝父卒扶櫬南還至  
黃州衝風飄舟下流二十餘里抵觸石崖舟中人皆  
奔走求免公誓與櫬相存亾頃刻不離翌午方定居  
喪哀毀骨立弔者至不忍見聞母宜人病痿弗良於  
言公常意揣色候凡致請必見領一夕寇將至亟負

之入山翼以二僕僕戀所携櫬力命棄之遂得脫處  
遇而返棄櫬尤存撫長弟妹婚嫁以時所以資給之  
皆厚貌癯神暢勇於有爲歷事三朝多所建白有人  
所不敢言者伏闕時有老中貴識之訝曰是在先朝  
官事多矣今尚爾邪公正色曰某始終惟是一節雖  
以議體忤 旨然天下逾亮其剛直云自奉儉約而  
仁於故舊好士有誠不樹私黨雖素所愛有犯必懲  
設所至人皆畏服於書無所不讀參互考訂博而能  
精曆數兵法奇遁之術皆臻其妙詩文清麗豐蔚一  
時作者多推讓之所著有餘冬序錄六十五卷間日

分義百卷撫滇條約軍中耳學平夷錄備荒書恤刑  
書奏議及舊稿通數十卷孔子家語賈傳新書陶靖  
節集易疑初筮西涯擬古樂府皆嘗爲之註解



南京工部侍郎張公鉞行狀

劉麟

張鉞字文輔江西安仁人弘治辛酉領鄉薦正德戊辰進士授浙之處州遂昌令遂昌古蠻荒之域俗用器強號稱難治鉞至首以教化安養爲法執法平恕獄無冤滯會江西姚源盜蔓延入浙境時承平旣久民不知兵公倡勇敢繕守備邑賴以安在遂昌三年以內艱去民立生祠祀之丁丑服闋赴京擢陝西道監察御史正色侃言獨持風裁宸濠謀逆朝廷重臣有陰附之者鉞首發其姦武宗欲南巡率同官連疏以諫伏闕不起至厯中使溫諭直聲聞天下正德

十六年奉 命巡按廣西吏部尚書陸完刑部尚書  
張子麟皆宸濠黨也濠事敗二奸倖免越劾奏之置  
法黜藩臬貪官姚鵬及靖江王府長史胡傑等諸王  
不法鉞奏請裁抑皆懼而自戢老奸宿猾望風遁迹  
嘉靖改元疏請復經筵崇聖學其言深切時弊癸丑  
進永平中以外艱不果赴丙戌夏服闋補金華守是  
歲民苦赤旱倉庫告竭賑貸弗給越爲請於上司獨  
來年民租復弛監禁以活民命屬邑永康義烏俗健  
訟案牘山積鉞推誠察微澆俗頓革期月政聲大著  
太宰桂萼屢致書稱勞鉞謹謝不職己丑遷浙江海

道副使時倭夷漳寇出沒爲患不常鉞嚴令申儆奸民以海舶取利乘間爲盜入境則倚豪勢爲淵藪鉞逮治當路者數家悉置之法由是盜賊屏跡自浙遷福建參政再遷湖廣按察使貪官污吏聞風遁去楚府有指揮楊姓者爲王爪牙導之不善竟逮治不貸搏擊豪強人咸畏服又遷四川右布政轉左布政使庚子進南京工部右侍郎簡工虞之弊率郎屬以身先之辛丑九廟災鉞上疏自劾不職乞避賢路弭天變時留都同疏得俞命者凡五人若呂柟鄒守益暨鉞皆一時重望去之日士民莫不惋惜家居常謂

諸子曰吾受國恩厚雖蒞官從事不敢不盡吾心然才質所限負吾君多矣沒世之後其勿以恤典爲請諸子守其訓故卒之日贈諡不及

南京工部右侍郎程文德傳

實錄

南京工部右侍郎程文德浙江永康人嘉靖己丑進士第二授翰林院編修以編修揚名論吏部尚書汪鋐連下詔獄謫信宜典史歷陞兵部主事郎中廣東按察司提學副使南京祭酒禮部侍郎改吏部尋加翰林院學士掌詹事府事教庶吉士簡撰玄文文德素講理學所撰不稱旨會推南京吏部尚書上擬文德欲脫不經之奉特旨調前職文德疏辭勸上享安靜和平之福上益怒以爲訕謗削籍爲民嘉靖三十八年十月卒貧無以殮文德篤學修行稱爲

儒者然好談當世之務率迂闊而難行雖嘗自以其  
學未究於用而識者不以爲然後贈禮部尚書謚文  
恭

南京工部右侍郎嚴公時泰行狀 應大猷

公諱時泰字應階漢子陵裔世爲餘姚人登正德辛未進士筮仕溧陽敷政清勤邑人張湛者素兇悍歷毗殺人莫敢誰何公廉得其實擒之僉言貫惡旣去閉里安生有昌黎驅鱷之論是歲恒陽烈天枯槁無所施力公躬親禱雨隨車而應屢登薦剡徵授南京江西道御史以戚畹例改鎮江府同知轉福建鹽司有浯洲場者與島夷相鄰恃鯨波之險三十餘年課賦不輸莫敢往徵公曰爲君之吏奉君之事豈可以風濤之故而自阻哉遂揚帆抵場旬餘輸稅萬計當

道褒之刻章首列尋陞雲南永昌府知府府係新設  
特賜聖書內有僉舉爾出身科甲素有才幹非特賴  
以撫安而實資以控制等語公抵任開州治設學校  
撫民夷鋤豪惡其土官宰烈猛等地方相攻訐天朝  
買象之價焚曉諭之文毀館穀之所故親詣其地諭  
以朝廷威德責其前後罪愆酋具賂以金帛奇貨十  
餘萬卻之是夜縱火焚營急持勅命僅以身免夫酋  
心慮賂不納恐加致討之兵預彰暴惡公更大宣朝  
廷威福酋始惕然興懼將蠻莫等地方退出天朝開  
設衙門息兩夷之仇矣故民夷有草木知名之謠永



昌有淫祠結黨興妖迷誘婦女公命拆之撫按交章  
屢薦朝廷有着吏部擢用之旨後陞山東兵備副使  
其年水旱頻仍民艱粒食公特疏奏停起運民稍蘇  
息又多方設法賑濟充曹之民活者數十萬壤接黃  
河不時淤駛公經略有方水患彌息迄今賴焉尋轉  
廣東參政時征安南有功賞銀十兩紵絲一表裏大  
享明堂恩封三代制曰身若不勝衣而其弘毅之量  
足以扛負國紀言若不出口而其文明之蘊足以黼  
敝皇猷投艱抵劇休有烈光忠亮之心純白之行介  
直之節三十年如一日也捧表入賀陞福建按察使

尋陞四川右布政使未任卽轉左轄徵財賦審緩急  
廉出入時建九廟採木於蜀夙夜圖維以副其用賞  
銀十五兩紵絲一表裏白草番猖獗平之都御史張  
時徹奏功賞銀十五兩紵絲一表裏尋以宗室屬籍  
久絕部爲題明陞南京太僕寺卿期月轉陞右副都  
御史巡撫四川時都蠻不靖荼毒西土稱王者十餘  
人公出奇兵征之俘斬千餘名顆渠魁之稱王者亦  
投首露布以聞賞銀三十兩紵絲二表裏加俸二級  
尋陞南京工部侍郎捧表入賀萬壽引年而歸卒時  
嘉靖二十九年年七十有二

南京工部右侍郎郭公鑾墓志

李璣

南京工部右侍郎郭公諱鑾字允新三泉其號也嘉靖戊午六月二十一日卒於南京官邸按郭氏本太原人其遠祖思賈於高平因家焉遂爲高平人恩七世孫曰欽者爲公高祖封御史欽生質知光州憲皇帝知其廉特勅褒異之質生定歷知通邳鄭三州定七子以長子鑾貴贈通議大夫工部右侍郎而次子城判安州封翰林檢討者生鑾及公鑾任長史公與從弟鑒又同年舉進士鑒副使而公復爲侍郎以是高平言鉅族無不推先郭氏者公生稟奇異自幼

善文詞出補邑庠弟子員每試輒先諸弟子嘉靖辛卯薦于鄉而舉進士則再科爲乙未是年上旣親賜諸進士甲第矣乃又御文華試選二十八人讀書于中秘益自成祖肇開館選後雖歷朝有行而親試慎簡茲寔再見馬公被選益肆力于學望日起辛丑授檢討尋丁父憂起考九年滿陞修撰已又奉命修我朝會典壬寅陞司經局洗馬兼修撰有清黃之命丙辰陞國子監祭酒丁巳陞南京工部右侍郎公戊戌春分考會試壬子秋上命偕官允尹公主應天試論者咸稱得人及公任祭酒則又端模範飾訓

典本經術造士而尤以德行為先故一時及門之士  
彬彬循循習爲一變惟公待人恕而自檢實密旣日  
勞公務手又不釋卷以是痰火病盛作會又哭其女  
旣而南鬱鬱不自平竟卒距生弘治己未十二月初  
三日得年六十 上聞爲遣祭緡紳士得訃無不悼  
惜者余與公相處二十年餘口不言人短長事卽羣  
中有言者竟不一接齒至事關官常而分當爲者則  
俛首任之曾不徇入而失正人又言公家居痛母李  
早卒奉父安州公兄長史公皆甚謹衆尤罕及作文  
有典則詩泥著自成一家類其爲人有翰林詩稿國

廣雅

卷之三

子入

學文集家居集若干卷藏于家

通議大夫南京工部右侍郎王公昺合葬墓志

銘

李開先

嘉靖丙寅八月十八日杏里王公卒公嘗有言大凡身後之文不必誇張太過無官者止敘其世系家衆及生成殯葬月日有官者總序發身歷官於前略取重事實點綴於後足矣今體公之意不敢飾也公姓王諱昺字承晦號杏里九歲喪其母慰安厥考拜送弔賓有非童幼所能及在學爲提學陳公鎬趙公鶴所稱許由嘉靖二年進士授太常寺博士丁父憂服闋除前職尋丁繼母憂服闋復除前職十一年遷

河南道監察御史明年河東巡鹽又明年真定巡按  
十六年陞江西布政司左參議十九年遷陝西按察  
司副使整飭西寧等處兵備二十一年陞甘肅行太  
僕寺卿聞者以爲屈二十二年改陞四川按察司按  
察使未任卽有陝西右布政使之擢二十四年轉左  
踰四載爲織造事降浙江左參政久之福建缺按察  
使同官擬必首公報至果然三十一年復右布政於  
河南已調山西右布政已轉湖廣左布政三十六年  
四月推雲南巡撫右副都御史兼贊理軍務三十七  
年閏七月拜南京工部右侍郎以言者致仕歸大抵



守法奉公責備所屬不以法假借於人未免因而取  
怨然君子見之則稱不絕口云自釋褐及授簪四十  
四年俱在嘉靖之世初觀政兵部未嘗不一日趨朝  
升部大冢宰聞其勤取選日留作選首得除太常寺  
博士因大司馬彭金兩公薦之也遇國恩贈父爲博  
士母太孺人妻孺人太常大小職任俱道流止一博  
士乃儒官小有失則陷之以禍而擠之公當之三年  
道衆竟無所乘其隙在道日會試監試場中凜凜畏  
之主考及禮卿各有棘闈詩公首和之大爲夏桂洲  
所許巡河東鹽課歲辦額銀外多積餘銀十餘萬兩

除補還先年遺負邊餉其不盡者預解邊鎮以備後  
日之不足聞大同兵變選壯子弟習騎射於團以備  
應援獲鹿縣有李姓者繼母將其夫閉於室縱火燒  
灰誣其子以殺父重罪繫獄待決十年餘矣一鞠得  
其情將繼母抵罪定州亦有李姓者父以惡疾自經  
繼母告官以爲其子致之問灰得公而釋其尤可稱  
者活貧屈男女百餘人則其巡真定時事也總督江  
西糧儲帶徵拖欠料價銀二百五十餘萬官不刑民  
民樂輸官工部誤以爲陳郎中之功奏陞少卿而公  
不與焉撫治西寧番漢錯居邊境寧謐論者以爲區

畫有法竟絕外囂故薦者稱其有屏翰之才撫按前  
後保舉二十三次處置寧州均地事尤得其宜復遇  
國恩贈祖父參議而母妻俱恭人云在陝給公文有  
限該吏遲違者定數責之納糧銀者自行稱兌庫藏  
官吏弗容近出財物有識巧詐侵換者計弗行出納  
羨餘雖少至分釐必登籍呈報裁抑太監織造料價  
銀二十餘萬且不循舊規分派百姓直給官銀以贖  
侵羨至今每次織造止用銀七萬兩遂爲定例當時  
雖身致詔獄謫官其爲國節財省費而民困甦矣甫  
逮至京原詰奏太監劉清卽歿亦天道也降浙不挫

其志分中嘉湖道巡至嘉興見其久無城郭慮有寇  
患遂連衆力修之工完未幾而倭奴猖獗士民安堵  
衆始服其先見矣在福建修泉州萬安橋專委方知  
府而計度悉出於公獲海寇百人巡按欲盡釋之公  
執不可縱之是召亂也巡按不聽乃今倭害一如其  
所料湖廣麻陽兵回沿途虜掠良家男婦子女四百  
餘名口匿之舟中公下令亟行搜檢衆懼而遣還之  
遂差官訊其鄉貫揭榜招領及離任仍有童稚者三  
十餘尚給廩食於官舍以待識認者未至雲南之先  
主人丁苴白改聚衆或間歲或比歲一出溪澗劫掠

居民必動官兵剿捕互有勝負而士馬物故久不能  
堪公則先揚兵威繼行撫諭彼乃悟而率衆歸附願  
作良民因集儒官輯古經傳語成書名曰同倫類訓  
給之誦讀南中士庶欲卽山中肖公像祠祀之公力  
止之俾建真武廟以殿疆域滇南人擬之銅柱云開  
元盛龍江土田獲灌溉之利室廬免滄沒之虞升菴  
楊慎嘗以文稱之至今傳焉公以弘治辛亥二月古  
八日生至卒得年七十有六

嘉議大夫南京工部右侍郎全公元立神道碑

申時行

余入詞林則聞長老諸先生亟稱少司空全公之賢也公沒且二十餘年墓木拱矣其孫天敘今翰林編修虛隧首之石圖所以不朽公者而屬余爲役余旣心嚮往公重以編修君之請義不得辭按狀全氏自漢桂陽太守柔以避亂家錢唐子琮封錢唐侯而全遂著稱江左越二十七世當宋光宗朝曰權者以侍御史改青州同知乃卜居鄞之光溪是爲鄞全氏始祖子二曰鼎曰俎以兩朝戚畹益貴重入勝國無仕

者明興始稍稍受職蓋從青州公十數傳而生濬菴公倫博雅方正里人嚴事之卽公曾祖也倫生文瑜文瑜生政學者稱南川先生由歲薦爲博士所至甚待士心後公貴封翰林院檢討配宋封太孺人生次夫子四公其仲也公諱元立字汝德別號九山生而奇穎讀書過目不忘諸名哲從南川先生游者一見皆嗟異或以經史大義難公公條答神駛諸公心器之弱冠試有司高等府倅某者館公衡齋館人病且殆公從戶外來扶持者恍忽聞鬼語云全公至矣謹避之公試爲朱書懸於寢病隨愈人以是奇公嘉靖

乙酉舉鄉試三上公車不錄乙未成進士改翰林院庶吉士丁酉授檢討辛丑充會試同考官所舉多名士尋丁南川先生憂哀毀骨立服闋補原官同修會典戊申滿九載考進修撰尋充經筵講官辛亥冊封魯藩藩以例厚餉公公立謝之去王故雅重公爲題九山圖以贈曰茲無點太史裝也癸丑復同考會試得人如初先是河套議起分宜忤督撫曾公銑譖于上逮論死并傾賁溪次第辟西市舉朝冤之莫敢有言者公憤然曰使吾職臺諫當以言爭職廷尉當以法爭吾職史獨董狐筆在耳援筆草告天文大抵



暴分宜橫狀比楊忠愍就辟公益盛詆分宜訟言于  
朝貢諛者輒以聞分宜怒甚屬所私刺公陰事卒無  
所得丙辰遷侍講學士掌南京翰林院時論率少留  
曹散地而公獨念太孺人春秋高省侍良便輒欣然  
就列琴具疏乞歸不允已未遷南京太常寺卿寺所  
領歲祝九十餘視國初時有治習廢弛者公至則戒  
百執事廩廩修職惟謹耳目一新郊壇過京營衛士  
穿塹垣爲捷徑公驚嘆曰此何地而令若是遂繚以  
崇垣懸令踰越者治罪間有犯者治如約諸衛士鼓  
煽加橫語危公公屹不爲動羣譁帖然樂舞生某者

以宜淫敗詞連勲貴人勲貴人居間欲寢其罰公曰  
吾不持惠文議勲貴人後幸矣柰何復撓吾法立不  
許南光祿缺卿太宰難其攝乃以屬公公署光祿事  
井井如家裁庖丁汰冗食清幕僚乾沒者歲贏金錢  
若干著爲令辛酉遷南京工部右侍郎所領水衡筦  
權將作諸務較他曹稍劇公左右大司空百度綜核  
歸於節慎無異太常光祿時也居數月以入賀行會  
歲旱言官以故事請兩都大臣當自劾公笑曰大孺  
人耄矣吾登鍾山望白雲起東海心未嘗不搖搖懸  
旌也維王父慎菴公缺然恩命故忍而及今度吾書

生耳不復能有所張樹業且休矣遂抗疏乞歸上  
意猶難去公而分宜乘間進得旨許致仕分宜謂  
公所親曰爲我訊全侍郎能悉歸田故否公撫掌答  
曰乞休得休豈相尼哉第爲我謝嚴公勉旃自愛比  
分宜敗輿論謂公且旦夕召乃公執太孺人喪寢疾  
不起矣公長髯修幹丰神俊爽望而知其爲偉人自  
少以簡重練達見推先輩及歿歷旣久該洽絕倫遇  
事輒迎刃而辦寓內北中虜南中倭軍興戰守動操  
前箸而當事者納鑒公無所見奇往往形之歌詠以  
泄其憤懣不平之氣守史官二十年以文章爲職業

宏蔚爾雅登作者之壇有集若干卷藏于笥謝政歸  
髮且斑白益嚴奉太孺人出必告反必面歲時舉觴  
不得太孺人色喜則不樂太孺人屬病公徂秋涉春  
不解帶藥餌必親嘗卽諸子息更前侍太孺人太孺  
人心不得公則亦不樂及喪太孺人一如喪南川先  
生竟以積毀歿世稱公純孝云生平無他嗜好雅不  
問家人產垣屋數椽與伯仲白首相向奉庾所入爲  
內外諸懿親舉火者常什伍也雅性耿直負節概疾  
首媵姁無間尊官貴游稍不當意卽正色譙讓不少  
借公嘗典教內侍故事多煦煦優容之公獨侃侃者

弗率者夏楚不貸比編修君步公武典教有長年巨  
瑄談之動色云噫若公者卽才不究施位不滿德乃  
忠義慷慨身任倫常亦旣較然暴於世矣老成雖謝  
謂典刑尚存非耶公生于弘治戊午閏十一月三十  
日卒于嘉靖乙丑三月二十六日享春秋六十有八

通議大夫南京工部右侍郎白石蔡公汝楠行  
狀

茅坤

公名汝楠字子木生而穎異甫八齡隨父東軒公遊  
南雍時甘泉先生進諸生講白沙之學公以兒年隨  
父入帷中從旁竊聽之輒點頭一座大驚年十八舉  
進士授行人函璽書賜齊楚諸王府所至輒按圖眺  
名山賦爲詩歌鐫之碑記以貽四方片楮所落人呼  
曰漢之襴衡也與燕張言河南高叔嗣毘陵唐順之  
晉安王慎中錢唐許應元姑蘇黃省曾及皇甫兄弟  
輩時時以聲律相高而公之譽問翩翩海內矣已而

念父夷軒衰繇刑部員外郎上書乞南省以便祿養  
於是改南刑部尚書顧公東橋聞人也雅奇公才公  
至遂爲忘年友久之出守歸德歸德故州也雖陳之  
間多巨盜稍稍嘯聚竊覲非常者改爲郡而公以才  
爲郡太守佩二千石印綬首出填之下車不數月郡  
中肅然當是時公以強幹聞兩河間未幾以母憂歸  
歸築一室於前山之麓且恥賢豪士不當以五言終  
身也於是下帷讀三代以來孔孟莊列荀楊下及騷  
選釋老列仙百家之書而最注心者古六經今所刻  
諸經札記是也服闋補衡州衡僻楚之南服故多廢

而公則撤去故守歸德時幹局稍稍以經術醞釀之不務聲名惟以廉白長厚持大體民甚德之朔望數進父老于其庭與之揖讓問民疾苦復飭石鼓書院與諸生絃誦其中予嘗吏粵南過衡州始至封以內問諸州縣父老父老並稱曰宋鄭清之以來罕有也已而公復召諸生歌石鼓之堂珊珊戛金石抱經倚席譬次如掌蓋漢文翁守蜀之遺也封以內多名山岫嶮祝融七十二峰之勝而公故善詩政暇數出遊遊必詠歌大略多附古者列國之遺郡之吏民至今能誦之者公旣去郡之薦紳先生帥吏民尸而祠之



徙四川按察副使公上章乞終養不報歷江西參政  
公又上章乞終養不報已而夷軒公不忍公之數上  
章不得也迺過江西邸舍公出則治簿書入則侍夷  
軒公父子以道相師夜間行郡輒過鄉東膠祭酒羅  
念菴司諫時時相與論學以究性命之旨久之夷軒  
公病且革公輿輓來歸服闕徙山東按察使再徙江  
西左右布政使歷都察院右副都御史巡撫河南召  
爲兵部侍郎典戎政嘉靖壬戌會虜犯京邑 天子  
稍厭司馬以下會公從諸公卿祝釐西齋宮 上從  
帷中望見公貌寢出公爲南京工部侍郎尋卒于官

予嘗按公學凡三變而其蒞官持政亦數與學相上下初釋褐時競爲聲詩然饒刻藻麗過南省則洗去鉛華合響卽劉諸大家矣歸德以後稍稍進經術然所至猶不能不以才指相高守衡州則寢寢近古循吏矣已而由戎政來歸予察公貌而扣之其息深深少也又若泠然萬物之外而世之升沉顯晦不以侵鬪其心者殆庶幾乎古之有道者已此其學於江西所得爲多公生平好著作不事生產內外綱紀諸僮僕米鹽以下並聽臧夫人操筦箠謹出入而不之知故公自少服官至卿貳猶蕭然如書生四方賓客所

共從遊往往若披穆風神解以去亦忘公之歷官卿  
貳者嗚呼若公者詩所稱不競不綏國之典刑是已  
惜乎享年僅五十而沒沒之日南都公卿百執事以  
下無問識不識相與憑其棺而號爲之潸然出涕訃  
聞於朝 天子爲之賜祭葬中外士大夫移書臨弔  
者不絕所著六經札記而下別有自知集樞筦集白  
石文集八十卷藏于家

南京工部侍郎劉公懋傳

劉懋萬安人嘉靖甲辰進士授司空尚書郎嘗權稅  
荊州多惠商之政已出知嘉興府時倭夷犯浙西兵  
部尚書張經提兵壓境懋爲調度糧餉民不勞而事  
辦比趙文華以工部尚書視師海上累橫索賂少不  
如意陷以大辟懋終無以應之第相見不激不阿而  
已文華卒不能害後轉兩司薦陞太僕寺卿擢僉都  
御史巡撫湖廣懋約已勤職每日詳撥案牘常至夜  
分喜諸司陳說利害凡建白當事情者卽付之施行  
甯濟竹峒河以殺漢水之勢沿江郡縣至今賴以播

植先是屏中鬼物畫出侮人前撫公多不利去或勸  
慈改爲慈以財誣重費訖不以介意施州土官覃壁  
劫印丞嫂將謀爲不軌慈上其逆狀討之自駐荊州  
而遣守巡官督諸將分道入剿又親書方略日致營  
中令諸將奉以行事攻圍半歲覃壁力屈自詣轅門  
伏辜比罷兵還省陞大理寺卿尋轉南京工部侍郎  
然竟以兵事積疲遘疾行至潯陽道中卒

正議大夫資治尹南京工部右侍郎新城方公

廉神道碑

汪道昆

上紀元壬午秋九月甲戌故南京工部右侍郎方廉  
考終新城有司以聞卹如典任子城奉諭舉葬事得  
兆天柱山之陽則以吳人周天球所爲狀抵刑部右  
侍郎王世貞爲志銘奉淑人羅以祔甲申春正月  
上遣藩大夫祭之於是城述制辭若狀若志若銘抵  
不佞道昆俾勒碑墓道方之先世著嚴陵白雲原建  
炎中以世醫著其後率守世業不儒則醫至公高曾  
從新城以儒著者在唐則處士千在國初則徵士質

以文學起新城訓邵武諭建寧者則貢士原源季父  
詮母弟溥皆造士源爲公大父是生公父模配錢淑  
人首舉公而公善病卽在外傳暱不程功公無煩父  
師孳孳受業以居邑草昧無繇得師遂入省從明師  
遊愈益攻苦比還邑省覲率徒行或病其勞則曰吾  
徐行二舍得腹藁一篇吾固耽此不爲罷耳形家言  
新城學宮不利請遷城北多福寺更之寺僧持之強  
縣官不能絀沙門洪聰夢神人語有社稷臣當出其  
中第勿爭旣竣工公以庚子與計偕明年辛丑召對  
公車除江西南康府推官折郡獄如迎刃若然而中

桑林所部以爲良移劾郡獄皆就公治部使者行縣必公俱公操法平無枉撓旣迎父養郡舍父以天年終貧無以喪賴上官賻至始歸葬主爵舉公卓異下徵書服闋入朝例得臺諫公謝主爵廉何敢擇官如必及簾言責非所任也乃受祠祭主事歷主客員外郎精膳郎中 上有事齋宮罷朝餘十年所公時時帥諸同舍計朝儀同舍或風公卽堯舜無所用垂衣安事綿蕞及庚戌虜入 世宗猝臨朝公相大宗伯上朝儀循行無所失時宗伯爲雲間徐文貞心獨多公會島夷數寇吳雲間首及於難大宗伯言之太宰



則以公出守雲間公至增陴深塹以杜憑陵列亭障  
宿甲士以張犄角寇數萬薄城下公率以暇應之城  
內外恃公爲安而甲士間出奇俘伏莽寇無所逞乃  
奔公以上海故無城再被寇議亟城上海公躬巡工  
城成朝登陴而夕禦寇寇無所逞乃奔公左顧而伐  
寇謀右顧而詢民瘼亟請停征發寬田租郡事故繁  
多弊叢會兵事起羣小乘而叢奸公畢力一振之其  
去如落遂以良二千石 賜金綺尋遷江西按察司  
副使備九江傾郡遮道留不可相率置祠事迄今俎  
豆之九江當楚蜀下流會縣官有殿材之役公薙萑

符母號澤飭六傳母稽程無何進廣東布政司左參政會嶺北有三巢之役率倚辦公當是時大宗伯業入政府適江南撫臣當更置首推轂故雲間守補之上以爲然尋進都察院右僉都御史治軍督儲如故公以兵荒代至民將不堪抗疏數千言直陳民間疾苦於時得減賦百餘萬不啻出民溝中乃汰冗兵併治兵使者請專設大臣治水利其言皆石畫尋進右副都御史中言者罷歸 穆考卽位起南京大理寺卿尋遷左副都御史總督漕運理淮揚諸郡故事中貴人守 皇陵者剛受民詞公按制禁止之罷勿

受及公以便計得請漕如期故事徐州單出丁夫任  
二洪役公憫其偏累則省漕司米易價募之請留徐  
州商稅以佐河工罷如皐屯兵以蠲坐食歲計減損  
踰萬絮令爲常尋轉南京工部右侍郎羅淑人卽世  
三引疾請老許之公歸仲弟少府炬季弟典儀秋左  
右杖屨怡怡然與之偕日討諸子姓而訓之先禮讓  
而次文藝乃治家廟葺先塋拓墓田修宗譜於是五  
宗雍睦門內外無間言邑中田賦多飛匿上書檄均  
人經之歲大侵請縣出倉粟以賑慮其不任而中道  
殍則又出私粟作糜餽之松檟二谿當巨湧之淫噉

堤梁悉圯公倡衆築堤以備水溢甃石梁數十丈爲  
青雲橋新鄉先正許公遠祠修縣志斤斤務持大體  
庶幾振既往而詔方來丘里州閭靡然顧化公年七  
十乃置高會召諸近屬周親比各盡驩卒爵而語之  
曰今而後吾將不與賓客事矣尤期舉曆卜日志之  
心及期則命子城秣家蔀以傳百體旣而就枕屏家  
人勿多訊以擾吾神卒無遺言瞑矣公息子二長卽  
城納婦凌次應者字鍾氏女四長適太學生鍾應星  
次適南京右府都事俞希范又次適諸生徐正蒙周  
吉士孫男女各一人不佞風鶴往公已復寓公宇下

唐公家食神人業以社稷臣命之顧位不過侍郎澤  
未及天下不簪何居要以特立端行功見言信古所  
謂居其厚不居其薄處其實不處其華公其人也謂  
之社稷之器誰曰不然藉令異日者書名太常野史  
氏請以是碑爲左契

通議大夫南京工部右侍郎理川江先生治行

狀

顏備

先生姓江諱治字舜卿號理川鵲項後伯益之裔也  
食邑九江以國爲氏其後累遷而家鍾陵者則自文  
忠公始公生孟誠孟誠生啓明啓明生贈通議大夫  
正奇正奇生贈通議大夫玠號晚翠居士晚翠公娶  
於楊生三子仲乃先生先生狀貌魁傑目光射人爲  
兒時輒昂藏不羣五歲就塾師受書一過卽能成誦  
十三歲舉茂才每試藝裒然高列先生家故貧晚翠  
公至以通賦逮罪先生適鬻其廬舍以解尊人之阨

自羸輿躡屨上書謁孫忠烈公公嘆曰此兒能孝他日必忠因試以小對先生應聲答之忠烈公大喜拊其首曰此千里駒乎公既賢先生而又知其家四壁立乃館諸別署復衣食之逮忠烈公歿宸濠難先生奔入豫章城縞衣練帶伏棺哭之極哀藩臬諸大夫咸謂江生剗虎牙而哭孫中丞也信國士哉時王文成公一見稱之授以三閩四要之旨先生自受知兩公聲稱籍甚而先生不自喜也益刻意尚行發憤讀書乙酉鄉試果以經術爲王石梁公首選屬厄於主試者爲江右第二人時年二十餘尚未娶金谿吳中

永西沱公高其義以女妻之先生之得吳淑人也協  
心併力奉二尊人吳淑人知先生苦於貧又時脫簪  
珥市甘脆以佐養由是二尊人靡不當意日融融然  
樂忘其貧矣丙申歲晚翠公與楊太淑人下世先生  
拮据裏大事惟謹偃蹇公車者二十餘年未嘗以貧  
故有所干謁間有以私請者卽正色拒之後石梁知  
建武郡聘入署中建武人執經造請者履錯於戶先  
生爲之說經義譚名理人無不敬服焉丁未登二甲  
進士授刑部主事時北虜犯邊衆多股栗先生初涉  
仕途輒慨然以夾誓諸曹郎壯之爲刑官務執法秉



公不少假借會藩王觀炯多穢德兩臺使具疏請  
上裁疏下司寇議諸曹郎以議貴欲薄治示警先生  
艱然曰滅倫入惡也卽藩王寧得而庇之庇一藩王  
而民俗其浸淫乎於是報疏竟寘之重典中丞商大  
節以備虜獲罪蓋權貴人中之也大司寇逢其意卽  
議次獨先生抗辭曰殺人媚人可乎主議者心愧竟  
從末減凡讞獄多所平反至繩貪墨吏率無所假不  
茹不吐先生有馬旋理刑淮漕事竣會東粵缺督學  
佞廷議謂非比部不可於是先生領璽書行諸所條  
教務以端行誼正文體爲先士風翕然丕變權貴人

請托固謝不聽風裁凜凜乙卯鄉試得七十有五人  
中王公弘誨袁公昌柝馬公象乾最知名是秋臬司  
諸大夫咸在棘圍獨先生署篆兼掌鹽政守藏吏進  
羨金千八百兩先生奮曰若分何以羨金溷我哉厲  
色叱之令卽解藩司以充軍餉先生名益著陞南京  
尚寶司卿三載考績陞太常寺少卿應天府尹缺推  
先生攝篆事先生爲節冗費三百卻羨金八百清操  
益勵三年考滿陞光祿寺卿尋陞太常寺卿頃之上  
書乞骸骨歸一上不許陞南京工部右侍郎先生度  
不得歸而國恩且浸厚乃勉就任時一上命織造先

生掌部事力爲節省諸妄費中貴人不得侵掠多怨  
之間肆爲飛語欲中以禍先生恬然不爲動也又一  
命下修理鳳陽二陵先生與龍白陳公同往陳公疾  
先生專任其事不十日而成工旣竣一上乃贈其祖  
若父爲通議大夫母楊氏爲太淑人廕一子人監讀  
書頃值邊警先生遍查庫藏所積銀得十有五萬卽  
令解京以濟邊需湖口舊有部使者權稅甚爲諸商  
人苦先生卽白之大司徒馬公森南直指張公承賚  
獨之至今商人德焉先生念在事已久復上書已休  
一上知其志已決乃允先生旣歸杜門謝客不問世

事所與往來者惟窮交及故人子弟耳問與一二同志講學務相叮嚀敦實行視世之飾僞而塗民耳目者大有徑庭其素性厭聲華而好淡泊嘗以角巾野服出遊田間稍遠則乘一蹇驢一小蒼頭從之見之者不知其爲江司空也每遇元旦聖節必設几焚香北向稽首過文廟必下車而趨春秋舉祀展謁如禮晚年貧益甚歲大侵家人數米而炊怡然自樂甘守清節絕無一私牘入公庭執政諸名公莫不推重歲舉大賓二十餘再荷恩詔存問年踰九十尚矯健無恙壬辰三月朔忽呼家人盥起先生亦起坐囑

子若孫曰吾生受朝廷厚恩愧無補報歿後母乞恩以重吾罪子孫各宜儉勤守貧無忘余言遂飄然而逝

南京工部郎中徐愛傳

郡志

徐愛字曰仁餘姚人正德戊辰進士出知祁州遷南京工部員外歷郎中愛娶於王蓋文成之妹壻也弱冠領鄉薦適文成請龍場歸論學於稽山愛深契之遂納贄稱弟子奮然以聖學爲己任後數年壬申文成自考功遷南太僕愛亦自祁遷南工部同舟歸越論大學宗旨益踴躍痛快如狂如醒者數日傳習錄卽是時所編也其自序云愛因舊說汨沒始聞先生之教實駭愕不定無入頭處其後聞之旣久漸知反身實踐然後始信先生之學爲孔門嫡傳舍是皆傍

蹊小徑斷港絕河矣如說格物是誠意功夫明善是誠身工夫窮理是盡性功夫道問學是尊德性工夫博文是約禮工夫惟精是惟一功夫諸如此類皆落  
落難合其後思之既久不覺手舞足蹈既而與文成  
同官南都愛性最警敏聞言卽悟又善發其旨時四  
方同志雲集文成至不能應每令愛介接之咸得所  
欲而去文成有南顧之命愛亦請告歸方與諸門人  
謀耕雪上之田以待其師而竟以疾終矣年才三十  
有一也訃聞文成哭之慟愛嘗遊南岳夢一瞿曇撫  
其背曰爾與顏子同德亦與顏子同壽文成每語輒

傷之在祁值劉六劉七之亂有保障功嘗疏陳十事  
多見采納居南工部廉勤克舉其職其墓在山陰之  
大峰山而子孫微矣



南京工部主事李君滄墓志

魏校

君諱滄字一清姓李氏世爲金華永康人其先有諱  
遠者唐杭州刺史其子暘爲參軍破賊有功遂家於  
杭暘之孫德明爲永康始遷祖曾祖諱秉良嘗代父  
詣獄而卒人稱其孝祖諱仁仲父諱鑑母蔣氏君自  
幼凝重不妄語笑常侍父母側承候起居如成人見  
者莫不嘆服甫長卽有志讀書侍師唯謹年十四補  
邑庠生弘治戊午領鄉薦赴春官落第南還適父疾  
枚不解帶者月餘及卒哀毀骨立葬奠悉准文公家  
禮限吟人太學時楓山先生爲祭酒甚器之正德戊

辰登進士第奔母喪哭至絕而復蘇者數四每以不  
得躬視湯藥殯殮忽忽如癡醉者兩閱歲遇忌日輒  
涕泣曰今雖欲盡孝敬不可得矣仲兄患足疾每自  
外歸必至寢前省視祁寒盛暑不廢家事無巨細必  
咨而後行季兄澤早世遺孤友杜方在抱撫育教娶  
若已子卒以成立辛未冬服闋赴選除授南京工部  
營繕司主事工曹歲迫恒哀民財不肖者緣是乾沒  
事涉內府多宦寺參主之積弊牢莫可破君蒞官一  
以清慎勤自將夙夜奉公視官事不啻家事爬蝨剔  
蠹毛髮不可干以私不爲利勢回屈始而物議齟齬

久之遂安以定今冢宰孫公爲工部尚書雅知君凡  
有興作悉委之君條其材用徒庸卒減前什之五六  
不忍靡國一錢以重病民孫公甚敬信之儀真歲運  
甕俵官民般附京師君督其事安靖識大體不爲細  
苛民用不擾而吏亦無所容其姦事可便民則爲措  
畫纖悉舟航往來及居民商賈之在儀真者無老稚  
賢愚咸誦其德儀真當漕河衝置壩蓄水惟大僚迺  
啓閘洩之中貴人利舟便多決閘以行君以法守拒  
之屹不爲動懼而止者甚多或贈以文綺之屬君例  
堅辭不受中貴人亦雅聞君名不敢強平生有守皆

此類踰年竣事而還復差司龍江抽分竹木廠君以疾辭時少宰石公署工部曰此非李主事不可必需其愈而遣之不得已起而視事藩府戚里有漏稅者君追而治之不少假借雖同事者亦憚其風采初乾清坤寧災至是勅取大木上供君親事如平日持法謹嚴而用意一本於仁恕不忍重權商人財令價賄貴以病民頌聲播遠近冢宰陸公聞其名方欲擢置吏部以自助不意寢疾而卒年四十有七病革時顧謂其所親曰吾夙慎勿材於公家爲吾平生累及卒無以爲殮妻徐氏盡鬻其裝始克歸柩賢士大夫相

與弔于朝行旅之人故有德於君者相與哭于野門  
生耆老之在鄉者相與白於有司爲立里門以旌之  
曰清修吉士蓋君之積誠動人也友人蜀王教以詩  
哭之云傷心病革買棺言千古同符易簣論識者以  
爲知言一清資質近道好義樂善不啻飢渴遊太學  
聞楓橋山論慨然有求道之志及官南都日以親賢  
講學爲事退食自公輒閉門不出潛心六經語孟及  
程朱文字而求窮理修身之方凡異端之說及近世  
詞章功利之習不以一毫經心嘗曰人之爲學當從  
人倫日用上實下功夫庶幾步步着實不爲空言故

其學踐履多於講明可謂平正篤實矣天假之年其所造當何如不幸齋志而沒不亦重可哀耶

南京工部屯田清吏司主事善山何君廷仁墓

志銘

羅洪先

嘉靖戊子余計偕北上求友四方咸曰君不聞陽明之門所評乎江有何黃浙有錢王蓋指雩都何善山秦黃洛村弘綱與紹興錢緒山寬王龍谿畿也未幾遇何黃兩君子途黃爲人方厚簡重而何君則魁形長髯廣目而豐準與人語必依所學無少長敏鈍咸懇欵援證譬喻指畫如有味乎其中而不能吐者必伺聽者意解乃已否則雖假宿傳食連日夕不爲倦也其煦濡而且婉變若此自是定交相與問難辯析

不少隱避後君歸田靡歲不相見見必踰月乃去庚戌冬大冰雪君留最久相語益合方期與余結鄰終老而病不可作矣又八年其子進恒葬君城東黃爲志而以銘屬予予曰知君者無踰於予二人是烏敢辭君初名秦字廷仁晚以字行字性之號善山當陽明先生以提督之節駐贛也常聚四方君子論學君聞黃所聞於先生者慨然曰吾恨不及白沙之門先生今之白沙也又可失耶友人以不利舉業尼之不爲聽會先生征桶岡裹糧追從相見于南康亾何丁繼母憂歸斬然以禮自度不徇流俗先生聞之曰是



能講以身者久之授以萬物一體之論與致良知之說終夜思之達旦不寐忽有省悟嘗曰吾人須從起端發念處察識於此有得思過半矣又曰知過卽是良知改過卽是本體其語學者每日學務無情斷滅天性學務有情緣情起覺不識本心二者皆病又曰執有無而論莫若俱忘只聽良知是非善惡莫能自欺有情自無不知知至至之更無可知此皆苦心察識而驗其必然不以人言少搖奪也惟其悟之甚艱執之甚堅故言之甚詳而不憚重複蓋謂舍此無以爲致良知之實持此處人自庶幾於一體之義而於

言句稍涉精深微密輒搖手戒曰先生之言無是無是凡海內談學之士人人善君君亦人人視爲知己至論學脉未嘗輕許誰何也君以諸生事先生在賴趙賴在南浦趙南浦在越趙越一不以舉業爲念每試據理直書顧往往出人右壬午舉鄉試上春官久不第辛丑授新會知縣喜曰吾雖不及白沙之門今幸聞其學又仕其鄉吾敢以俗吏臨其子弟耶始至釋菜于祠而後視事乙巳遷南京工部屯田清吏司主事分司儀真歲餘榷貨蕪湖所至有聲滿考投牒吏部乞致仕去不少濡滯是時年纔六十有四而貌

又壯實時論莫不以爲高君少善治生家故豐而自奉極儉及聞學勇於克己而急於就義卒之日囊無餘金稱貸而後襄事嗚呼君之見重於師門者有以也夫何之先有伯勝者以好修聞里中四世至景忠景忠生汝礪汝礪生克平克平生潛字若愚若愚公質直長厚以君貴贈承德郎南京工部屯田司主事生三子長奉武平知縣次春歷詔安含山霍山三縣知縣君居幼霍山與君同事先生而性慷慨有大節皆能不負師門

焦太史編輯國朝獻徵錄卷之五十三終